

Arubaanse Courant . - (dialuna 4 di juli 1966), p. 3

THE THREE VOICES A TITULA CAMPEON DI ANTILLAS

WILLEMSTAD - Ayera diadomingo nos por a disfruta di e campeonnan di Corsow y Aruba respectivamente The Three Voices y The Golden Treasurers. Un teatro completamente yen tabata testigu di cu e dos mihor bandanan di Antillas tabata den accion.

E dos agrupacionnan aki a entrena seriamente pa e contest di ayera mainta y a mostra cu nan trainingnan no a bai pordada. E amantenan di softmusic o mihor bisa "beat-music" cu tabatin den teatro Roxy a anima nan favoritonan banda banda. The Three Voices como campeón di Corsow a yega na e titulo maximo entre bandnan, ora cu ayera pa un diferencia di mas o menos cien (100) punto nan a gana e titulo di "Campeon di Antillas." E muchanan di The Golden Treasurers a bini mihor den forma cu nunca y a hanja hopi aplauso di e fanaticonan. Ta di compronde cu e fannan di The Three Voices tabata mas grandi, pero toch nan

a debati amicalmente cu otro te ora cu Jubi Naar y Eddy Oleana a hasi anuncio di e puntonan obteni pa e dos bandanan. E decision di hueznan a ser acepta pa tur e fanaticonan di The Golden Treasurers.

E hueznan tabata, Boystie Labega, Ronny Brete di Aruba Edgar Cypriano y Ivon Sampson di Corsow, mientras cu e huez neutral tabata Ralph Kock.

Nos a aprecia con e dos bandnan a actua, pero especialmente con e dos grupo di fanaticonan a comporta. Tur cos a sosode den un ambiente alegre, caminda uno tabata grita contra y uno na favor. Nos a ser anuncia pa Sr. Addison Croes, organisador di e contest.

cu esaki ta e contest oficial di Antillas. Un pregunta cu a ser hasi tabata: No tabata e intencion di organisa un contest entre e campeón y subcampeon di cada pais hunto pa mira e campeón di Antillas? Sr. Croes, simpaticamente a contesta: Realmente esaki tabata e intencion, pero despues a yega e decision di cu lo tabata mas razonable di laga e dos campeonnan so, competi pa e titulo di Campeon, mientras cu e dos subcampeonnan lo a bai contra otro pa e titulo di Subcampeon antillano.

No a keda nada otro na Corsow, sino palabranan di elogio pa e muchanan di The Golden Treasurers, ya cu esakinan a laga nota un tremendo progreso, tanto den tocamento, actuacion (show) como nan cantantenan.

Nos felicitacion ta bai na e campeonnan di Corsow y awor di Antillas The Three Voices y un sincero felicitacion pa e subcampeonnan di Antillas The Golden Treasurers.